



Klub poslanika Naša stranka - Nezavisni blok

Broj:

Sarajevo, 08.08.2022. godine

PARLAMENTARNA SKUPŠTINA  
BOSNE I HERCEGOVINE  
PREDSTAVNIČKI DOM

n/r g. Nebojša Radmanović, predsjedavajući

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO: 08-08-2022			
Organizaciona jedinica	Klasifikaciona oznaka	Redni broj	Broj priloga
01-02-2		1321/22	

Na osnovu čl. 163. Poslovnika Predstavničkog doma Parlamentarne skupštine BiH, u prilogu dostavljam Prijedlog:

**REZOLUCIJE O PRIHVATANJU RADNE DEFINICIJE ANTISEMITIZMA  
MEĐUNARODNOG SAVEZA ZA SJEĆANJE NA HOLOKAUST**

te molim da ga u skladu sa članom 163. stav (2) uvrstite na dnevni red iduće sjednice Doma.

Podsjećam da, u skladu sa navedenom odredbom Poslovnika, prema kojoj se prijedlog rezolucije razmatra „na sjednici Doma“, te ustaljenom praksom, prijedlozi rezolucija nisu podložni razmatranju u komisijskoj fazi. Ovo dodatno potvrđuje i čl. 164. stav (2) Poslovnika, koji precira da se amandmani „podonose u pisanoj formi tokom sjednice“).

S poštovanjem,

Damir Arnaut

Poslanik u Predstavničkom domu

Na osnovu člana IV.3.d) Ustava Bosne i Hercegovine, te na osnovu člana 163. Poslovnika Predstavničkog doma Parlamentarne skupštine Bosne i Hercegovine, Predstavnički dom, na svojoj 32. sjednici održanoj ..08.2022. godine, usvojio je

## **REZOLUCIJU O PRIHVATANJU RADNE DEFINICIJE ANTISEMITIZMA MEĐUNARODNOG SAVEZA ZA SJEĆANJE NA HOLOKAUST**

1. Predstavnički dom Parlamentarne skupštine Bosne i Hercegovine prihvata Radnu definiciju antisemitizma Međunarodnog saveza za sjećanje na Holokaust (IHRA), sa ilustracijama, koja glasi:

Antisemitizam je određeno poimanje Jevreja koje se može iskazivati kao mržnja prema Jevrejima. Postoje usmena, pismena i fizička izražavanja antisemitizma koja su usmjerena prema Jevrejima ili nejevrejima i/ili prema njihovoj imovini, ustanovama jevrejske zajednice te jevrejskim vjerskim objektima.

Manifestacije mogu biti usmjerene i protiv države Izrael, koja se smatra jevrejskim kolektivitetom. Međutim, kritiziranje države Izrael slično onome kakvo se upućuje bilo kojoj drugoj državi ne može se smatrati antisemitizmom. U antisemitskim napadima često se optužuju Jevreji za urotu s ciljem da se našteti čovječanstvu i često se takvi napadi koriste kako bi se Jevreje optužilo zbog toga „što stvari idu loše”. Antisemitizam se iskazuje u govoru, pisanju, slikovnim oblicima i djelima, a koristi se pogrešno po stavljenim stereotipima, kao i negativnim karakternim obilježjima.

Savremeni primjeri antisemitizma u javnom životu, medijima, školama, radnim sredinama te vjerskom životu mogu biti sljedeći, uzevši u obzir cjelokupan kontekst, ali se ne moraju svoditi samo na:

- pozivanje, pomaganje ili opravdavanje ubijanja ili ugrožavanja Jevreja u ime radikalne ideologije ili ekstremističkih vjerskih stajališta;
- stvaranje lažnih, dehumanizirajućih, demonizirajućih ili stereotipnih optužbi protiv Jevreja kao takvih ili Jevreja kao društvene skupine. Optužbe takvoga tipa su posebno (ali nisu i jedine!) mit o svjetskoj jevrejskoj uroti ili tvrdnje da Jevreji vladaju medijima, ekonomijom, strukturama vlasti ili drugim društvenim institucijama;
- optuživanje Jevreja kao naroda da su odgovorni za stvarna ili izmišljena nedjela koje je počinio neki Jevrej kao pojedinac ili neka skupina Jevreja, ili čak za djela koje su počinili nejevreji;
- osporavanje činjenice, razmjera, mehanizama (na primjer plinskih komora) ili organiziranosti genocida nad jevrejskim narodom koji su počinili nacionalsocijalistička Njemačka i njeni saveznici tokom Drugog svjetskog rata (Holokaust);
- optuživanje Jevreja kao naroda ili Izraela kao države da izmišljaju ili preuveličavaju razmjere Holokausta;
- optuživanje jevrejskih građana neke zemlje da su lojalniji Izraelu nego vlastitoj državi ili da postoje navodni prioriteti Jevreja širom svijeta koji su im važniji nego interesi njihovih vlastitih država;

- osporavanje Jevrejima pravo na samoopredjeljenje tvrdnjom da je postojanje Države Izrael rasističko po svom karakteru;
- primjenjivanje dvostrukih mjerila zahtjevima da se Izrael ističe ponašanjem koje se ne očekuje ni od jedne druge demokratske države;
- korištenje simbola i slika koji se povezuju s klasičnim antisemitizmom (na primjer tvrdnje da su Jevreji ubili Isusa ili optužbe za ritualna ubojstva) kako bi se okarakterizirali Izrael ili Izraelci;
- uspoređivanje današnje izraelske politike s nacističkom;
- smatranje da su Jevreji kolektivno odgovorni za djela države Izrael.

**Antisemitska djela su krivična** djela kada su tako definisana zakonom (na primjer u nekim zemljama poricanje Holokausta ili dijeljenje antisemitskih materijala).

**Krivična djela su antisemitska** kada su mete napada, bilo da se radi o ljudima ili imovini – kao što su zgrade, škole, mjesta molitve i groblja – koji su izabrani zato što su jevrejski ili se smatra da su jevrejski ili su na bilo koji način povezani sa Jevrejima.

**Antisemitska diskriminacija** znači uskraćivanje Jevrejima mogućnosti ili usluga koje su dostupne za ostale što je u mnogim zemljama suprotno zakonu.

2. Predstavnički dom ovom Rezolucijom i prihvaćanjem navedene definicije izražava svoj stav i utvrđuje političke smjernice koje će provoditi Predsjedništvo BiH, Vijeće ministara BiH i druge institucije BiH.
3. Predstavnički dom traži od Predsjedništva BiH i Vijeća ministara BiH da intenziviraju aktivnosti s ciljem ostvarivanja punopravnog članstva Bosne i Hercegovine u IHRA-i.
4. Ova Rezolucija stupa na snagu danom donošenja, a objavit će se u „Službenom glasniku BiH“.

**Predsjedavajući**  
Predstavničkog doma  
Parlamentarne skupštine BiH

---

## **O B R A Z L O Ž E N J E**

### **I. Ustavni osnov za usvajanje Rezolucije**

Ustavni osnov za usvajanje Rezolucije sadržan je u članu IV.3.d) Ustava Bosne i Hercegovine, koji precizira da svaki dom usvojiti svoj poslovnik o radu, te u članu 163. Poslovnika Predstavničkog doma Parlamentarne skupštine BiH koji predviđa da „Dom može rezolucijom izraziti svoj stav o relevantnim političkim pitanjima i utvrditi političke smjernice koje će provoditi Predsjedništvo BiH, Vijeće ministara BiH ili druge institucije BiH.

### **II. Razlozi za usvajanje Rezolucije**

Međunarodni savez za sjećanje na holokaust (IHRA) okuplja vlade i stručnjake radi jačanja, unapređenja i poticanja obrazovanja, sjećanja i istraživanja o Holokaustu širom svijeta te provedbe obaveza iz Deklaracije iz Stockholma usvojene 2000. godine.

Radnu definiciju antisemitizma IHRA je usvojila 2016. godine i od tada su definiciju usvojile ili odobrile brojne zemlje i vladina tijela.

Neophodno je da se Bosna i Hercegovina – u punom kapacitetu – pridruži tim zemljama. Poslovnik Predstavničkog doma daje takvu mogućnost – usvajanjem Rezolucije, Predstavnički dom istovremeno izražava svoj stav o ovom pitanju, te utvrđuje i političke smjernice za djelovanje drugih institucija Bosne i Hercegovine po istom.

Ovo je u skladu i sa komparativnim primjerima kada su u pitanju djelovanja drugih parlamenata (Parlament Albanije je usvojio Rezoluciju – <http://www.ambasadat.gov.al/israel/en/albanian-parliament-thursday-passed-resolution-joining-global-efforts-combat-anti-semitism>).

### **III. Principi na kojima je prijedlog Rezolucije zasnovan**

Ovaj prijedlog Rezolucije je zasnovan na principima pravde, tolerancije, suživota i demokratskih vrijednosti.

### **IV. Finansijska sredstva za provedbu Rezolucije**

Za provedbu ove Rezolucije nije potrebno osigurati dodatna finansijska sredstva.

### **V. Druge okolnosti**

Predloženom Rezolucijom se Bosna i Hercegovina približava drugim zemljama regiona po ovom bitnom pitanju, te se traži i intenziviranje aktivnosti. Bosna i Hercegovina trenutno ima status posmatrača u IHRA-i, dok su Slovenija, Hrvatska, Srbija i Sjeverna Makedonija punopravne članice. Ostvarivanje punopravnog članstva podrazumjeva kompleksnu proceduru, te je neophodno intenzivirati aktivnosti po ovom pitanju (<https://www.holocaustremembrance.com/about-us/countries-membership/membership-and-application-procedure>).